

## Petoroac Kibi 1

<sup>1</sup> Ni Petoro, Yesu Kristoac aposorongo meisingfora Ponto nga Garatia amma Kapadokia nga Asia amma Bitinia bangectoau israengicngac singsararang kpema kuric kecdae, ngeneac kibi yomoc ohoduae. <sup>2</sup> Anutu Manggacngo bic negenu feecac yeng meisingngunuma yofi desiec, Tiri Asungo ngenearu ua meu yadiseri amma kpetiac anggecde. Ifi amma ngeni yeac enac tofohogec Yesu Kristoac sacngo kpegui nadzicngemmeec kecdae. Yeac danggunuc nga ruaengo ngenearu sahema febeso.

<sup>3</sup> Nenang Kebunina Yesu Kristo, yeac Anutu Manggac kenehebisina. Yeng wosoefactoa kpenemmema Yesu homecfunac megboriec. Sing imohai nenang kekec meficgenemmeu fingec fingec gboria fingering. Ifi fingecma yeac wiac kekehagoc fingecnemmebesande, imoc negensinggema kecdimbe. <sup>4</sup> Ye ifi amma kurumenga kurumenga fekende, imohai maridzominnina tini enudeac bic faiec fede. Nga wiac imoc mi kpac anude amma imoc naric mi dzameude, imoc kongaha feengkefude. <sup>5</sup> Ngeni negen negensinggoc kecmagec Anutu ye kuhagocngo garengngunuu naso wisic wisickeau komoc kpegecde. Imoc fingerudeac efaima fede.

<sup>6</sup> Anu naso kapianec yomohai ebic nga faitobang hania hania fingecngemmeu ongangina dzokonemanu ngeni sifu wiac ngade haude, imocac negemma mamangkima

sogaima kecbisia. <sup>7</sup> Gol siriha negendimbe. Ngic yeneng imoc tobanggema siriha henggecdeac gerecfu faigec dzema isinggeandae. Gol fora ye fingectegerude nga imoc sifu ngade kpac anude. Nga negen negensingngina fora, imoc gol ferahema wiac engena anude. Yesungo fingectegerude, naso imohai negen negensingngina imocngo dedengerec nga kuc kibikperagiagoc amma ewehihehi meficgeude. <sup>8-9</sup> Ngeni ye kicnginango mi henggec amma sifu yeac songo negendae. Nga yofnenggac ye mi hengandae amma ngeni sifu ye negensinggecede. Amma ngeni ye negensinggegec, yeng ubaolangina kopocsicac ebicfunac mesingemmeu ngeni komoc kpegecede. Ngeni imoc negensima sogac sogai ebiriangoc amma kecdae.

<sup>10</sup> Profete yeni ngeneng Anutuac wosoefac megecdeac kpefing degec amma yeni komoc kpekpea sing negengireckegecdeac uatoa mekecgec. <sup>11</sup> Ifi anggec Kristoac Asungo yenearu kecmanu Kristongo kpendzeng kpema ngade kuc kibikperagiagoc mebesande, imoc Kristoac Asungo herenginau kefecac kpefinnu bic edzacyunuu dekperagingemmegec. Amma imoc meracac yoac nga noc nasou fingeru henggecdeac kicfifi anggec. <sup>12</sup> Kicfifi amma yenang mefice-megecdeac kpac, imoc ngeni meficngunugecdeac yoara dekperagingemmegec, Anutungo imoc edzacyunuu yeni ireckegec. Kecma Anutungo Tiri Asu kurumennunac bangecfu sueu mama siduc gombang dedengic kuc yemmeu, yeni yoac imoc mema dekperagingemmegec ngeni

imoc negenggec. Nga Angero yeni imoc ifingoc henggecdeac ayemmeande.

<sup>13</sup> Imocac meheng kpeheng amma ubanegen negengga isinggema geanggaoc garengememana Yesu Kristoac hahanasoya fingectegeru imohai wosoefaha mehaude, ge negen negengga yeac wosoefacfu hafoangoc seria faina febeso. <sup>14</sup> Ngeni warac siduc gombunggac yoac mi negentegecma sebiac songo modacgec. Amma ngeni enac tofoc tofoho nambarac isoc kecdaeac sebiac songongo monggoc mi garengngunubeso. <sup>15</sup> Anutungo kpacngunuec, ye kpetiac nga ngeni ifi isoc faka nga angammemengina hafoangoc kpetiac ambeso. <sup>16</sup> Imocac yofi oho ohoya fede,

“Ni kpetiac, imocac amma ngeni kpetiacngoc kecbisia.” (*Sesememe 11:44-45; 19:2; 20:7*)

<sup>17</sup> Anutu ye monde mondea mi femide nga yeng ngicngac tembuc tembuc angammemenginaac sirihaui yoacngina desiude. Nga ngeni ye “Manggac” kpacandaeu, ngeni yei kurickekecac nasonginau eweheimima kecbisia. <sup>18</sup> Ngeni warac bangecfcngina yeneac sicsauc fakau kecmagec Anutungo bungngina mema meisingunuec, imoc siriwa me golngo kpac nocac siriwa nga gol imoc kpac anecde. <sup>19</sup> Ye Kristoac sacngo bumengunuec. Nga Kristoac sac imoc wiac engena yombong, imoc rama medaha mong puringa kpac nga ebiha kpac, yeac sac isoc. (*Makekeng 12:5; 29:1; Sesememe 22:17-25*)

<sup>20</sup> Bangec nga kurumeng mi fingecmaec Anutungo Kristo bic meisinggeec. Meisinggeu yeng yaguc naso wisic wisickeau nenanggac amma fingectegerec. <sup>21</sup> Fingectegecma

sing meficgenemmeu yofinenggac Anutu negensingema kecdimbe. Ye medaha homecfunac megborima kuc nga kibikperagi miu nenang Anutu negensingema yearu negen negennina naric fainide.

<sup>22</sup> Ngeni yoac foraac enac tofohogec, imocngo ubaongangina dzuaru ubaherenginaunac songotoa ereu ngeni tosofocngina heresongogoc hoangyunugecde. <sup>23</sup> Anutuac yoac imoc kekehagoc amma seria nande. Yoac imocngo megboringunuu fingec fingec gboria fingecgec. Kpea imoc dzonggo dzonggoa kpac imocngo nemonggema kekecserigoc anude.

<sup>24</sup> Imocac yoac yofi oho ohoya fede, “Ngicngac sasawa bangecfu kecdae, yeni kpinzing isoc amma kibikperagingina imoc dzaring dzuria isoc. Yeni kpinzing dzanggeande nga dzaring dzuria moronggeande, ifi isoc dzanggegecde.”  
(*Yesaia 40:6-8*)

<sup>25</sup> Anutuac yoacngo ine fefeseri feude. Imocngo siduc gombung ande nga ngic yeneng imoc edekpou angemmegec negenggec.

## 2

<sup>1</sup> Ngeni ngaba hania hania nga ikocfaka amma keracmanganggac faka wama ngicngac mi demanganeyunubisia.

<sup>2-3</sup> KEBU ye gombunga, ngeni imoc bic tobanggegec. (*Mitiyegec 34:8*)  
Imocac ngeni sabac gboriango namuac ammiande, ifi isoc Asuac arennu namu kongaha imocac angemmebeso. Ngeni imoc nema

yadimagec yeng ebicfunac mesingunuu komoc kpegecde.

<sup>4</sup> Kebu ye hoctoa kekehagoc, ngeni yearu habisia. Ngic yeneng hoc imocac hoc mangana dema meickegec. Nga Anutungo imocac negenu siriha engena anu imocnoc meisinggeec. <sup>5</sup> Nga ngeni ifingoc hoc kekehagoc yeac siric andae. Nga Anutungo asu ama mengunuande. Mengunuu ngeni yengena womong gareng kpetiac amma Asuac sinnu sese faigecde, imoc Yesuac amma Anutungo henu ngereeude. <sup>6</sup> Imocac mitikibiu yoac yofi oho ohoya fede,

“Negenggec, ni hocwotung mong siriha engena imoc meisinggema Sionnu gununggebade. Ngic mongngo ye negensinggeude, ye gamekpekpeu naric mi enude.” *(Yesaia 28:16)*

<sup>7</sup> Ngicngac ye negensinggema kecdae, ngenearu hoc imocngo siriha engena ande. Nga mi negensinggedae, yenearu yofi fingerude,

“Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude.” *(Mitiyegec 118:22)*

<sup>8</sup> “Nga yeni hoc imohai kpondzong heigecde nga peperandziu tifainggema negemmangang meficgecde.” *(Yesaia 8:14)*

Yeni Anutuac yoac kpeandaeac ifi anggecde, yoac imoc yeneac bic dedea.

<sup>9</sup> Anu ngeni Anutuac faka kuhagoc dekper-agigecdeac Anutungo ngeneac areng meisingngunuec. Meisingngunuma ngeni yengena areng ngicngac kpetiac

anggecdeac mengunuma ngictauac arennu  
faingunuu womong garengua mekecgecde.  
*(Makekeng 19:5-6; Yesaia 43:20)*

Yennoc kundunnunac hagecdeac kpacngunuma  
kperagiau heitaingunuma yengena kperagi en-  
gena, imohai faingunuec. <sup>10</sup> Ngeni warac ngic-  
ngac areng mocgu mi kecgec, kpac. Nga yaguc  
Anutuac ngicngacfora amma yeac areng kec-  
dae. Ngeni warac Anutuac wosoefac mong mi  
hengkecgec. Nga yofinenggac yeac wosoefac  
hemma kecdae.

<sup>11</sup> Songo tosofocna, ngeni bangec yomohai kuric  
kecdae, imocac ngeni uba eseaac negensongo  
hania haniango ubaonganginagoc dzikac  
kpeande nga ngeni imoc wama kecgecdeac  
gorongina kpema deduae. <sup>12</sup> Ngeni bangec  
monnunac ngicngac, yeneac botucfu faka nga  
angammeme gombunga angkecbisia. Ifi anggec  
yeni ngeneac dedeseriyoac kpekpeareng dema  
enacfu faifai angemmema angammemengina  
gombunga henggecde. Ifi hemmagec Anutungo  
yeni yugucyunuu naso imohai dengeregecde.

<sup>13</sup> Ngeni Kebuac amma kia gawamang, ye-  
neac enac tofohobisia. Imoc ngictaungo kuc sa-  
sawa mekecde nga <sup>14</sup> yeac bageau gawana sa-  
sawa. Yeng uayoac yemmeu yeneng ngicngac  
angammemengina mangana angkecdae, yeneac  
turing kpouyemmegecde. Nga faka gombunga  
angkecdae, yeni dengereyunugecde. <sup>15</sup> Ngic yeni  
negen isingngina kpac wiac mong mi negen-  
tegecdae, imoc ngeni angammemengina gombun-  
gango enacngina midomebisia, imocngo Anutuac  
songo ande. <sup>16</sup> Ngeni witicfu mi kecdae nga

witiha kpac kekec, imocngo angammemengina mangana mi kperahebeso, kpac. Ngeni Anutuac wanac areng kecbisia. <sup>17</sup> Amma ngeni ngicngac sasawa ewengina heima negen negensinggoc tosofocngina heresongogoc hoangyunubisia nga Anutuac damungunuu ngictau eweheimibisia.

<sup>18</sup> Wanacngic kecdac, ngeni mingingfocngina yeneac enac hafoangoc modacma ewengina heima kecbisia. Ngeni mingingfocngina yumea nga gombunga amma gori goria momoc ifingoc ayemmekecbisia. <sup>19</sup> Ngic mong ye Anutuac yoc ubahereau feu imoc modaru goango kopocsiha kpac hemmaguc sifu ebicfu faigec kpendzeng kpeudeu faka imocngo danggunuhagoc anude. <sup>20</sup> Nga ngic yeneng kopocsicnginaac amma ngunugec ngeni kpendzennu emma imocac bageu seria kecgcedu imocngo dedengerecac wiac mong mi ande, kpac. Ngeni ine angammemengina gombunga ammagec kpendzennu faingunugec imocac bageu seria kecgcede, imocngo Anutuaru danggunuhagoc anude.

<sup>21</sup> Ngeni ifi anggedeac Anutungo kpacngunuec. Anu ngeni Kristoac hanititi modacgedeac yeng ngeneac amma kpendzeng kpema sing imoc edzacngunuec.

<sup>22</sup> Ye kopocsic mong mi meficgeec amma yeac enacfunac ikocyoc mong mi negenggec. *(Yesai 53:9)*

<sup>23</sup> Nga yeni defagoc ammigec yeng turunga sowe-cyoac mong mi merenec. Nga kpendzeng kpema dekengec mong mi ayemmeec, kpac. Ye ebiha Anutungo yoc dindingac desikecde, yeac mariu

faiemeec. <sup>24</sup> Ye yengena sebiango nenang kopoc-sic atickema icfu nanec. Nanu nenang kopocsic-funac homema sing dindingac modacnideac ifi anec. Nga yeac kubecngo ngeni hafeidzoicfunac ngerec ngeree meficgengemmeec. <sup>25</sup> Ngeni warac rama isoc sing segema kecgec. Nga yofinenggac ramagarenggaru bic dzigenegec yennoc ubaon-gangina henggareng angemmeude.

### 3

<sup>1-2</sup> Anu ngac ngeni sing imohaingoc ewefoc-ngina enacngina tofohoma kecbisia. Nga ye-neac botucfunac goango Anutuac yoc mi negens-inggegedeu enengfocngina ngeneng Mitiac yoc mi ede edeyunuu angammemengina gombun-gangoc angkecgec, imocngo ewefocngina Kebuac sinnu taiyunuu kenggede. <sup>3</sup> Ngac ngeni orucd-zongina dzegeandae nga kubu nganoc golngo memea sebinginau faiandae amma wamba siriha gombunga heiandae, imocngo siric kerengngina mi meficgebeso. <sup>4</sup> Nga ongaasungina yumea nga ruaegoc ubaherengina manau sufu sufuya fede, imocngo siric kerengngina meficgebeso. Imocac kibi kuha mi maande nga imocngo fekengkefude nocac imoc Anutuac kicfu wiac engena ande. <sup>5</sup> Ngac kpetiac warac kecgec, yeneng sir-ihha ifingoc kibingina meemma ewefocngina enac-ngina tofohoma Anutuaru negen negengngina faikecgec. <sup>6</sup> Imoc Sara isoc, yeng ewea Abrahang eweheimima kunenna dema enara tofohokefec. Ngeni faka nga angammeme gombunga mekecma wiac monggac dekengeha kpac kecgecdeu Saraac naroangfora anggede.



<sup>7</sup> Ngacac kuc, imoc ngicacsoc kpac. Ngic enengfocnginagoc ngeni imoc negensima imocac sirihau yenigoc kecbisia. Nga ngeni kekecac danggunuc imocac maridzoming ngenahafoc megecdeac nga ngic ngeni nunumunginaac kpae fingebacac amma enengfocngina eweheihei ayemmebisia.

<sup>8</sup> Kpeturanggema deba, ngeni sasawa negen negengngina mocgu febeso. Ngeni wosoefac ange-mema heresongogoc hoangemema ubamangang negengemema memaemema kecbisia. <sup>9</sup> Ngicngac yeni mangana angemmegec ngeni turunga mangangoc mi merengyemmebisia nga yeni desofoc angemmegec ngeni turunga desofocngoc mi ayemmebisia, kpac. Ngeni kenec imoc maridzomingngina anudeac kpacngunungunuya, imocac yeni ifingoc kenecyoac edeyunubisia.

<sup>10</sup> Imoc yofiac,

“Ngic mong ye kekecac songo negembeso nga naso gombunga hembesonga ammikecde, ye nedzaranga yoac mangana debacac nga enacbibihango ikocyoac debacac garenggebeso. <sup>11</sup> Ye faka mangana ngadehema angammeme gombunga angkecbeso. Amma ye ruaeac sing meficgeudeac uatoa mebeso. <sup>12</sup> KEBUNGO ngicngac dindingac yenearu kic fima nunumunginaac kedzac kpeude. Nga mangana mekecdae, yeni ine yenengwa anude.” *(Mitiyegec 34:12-16)*

<sup>13</sup> Ge faka nga angammeme gombunga annadeac mamangkima angkecnadeu ngicngac

yeni memanganegugecdeac obohoma wagecde.  
<sup>14</sup> Amma yeni dindingac kekecnginaac amma kpendzenu faingunugecdeu, imoc ngeni kenecnginagoc.

Ngeni yeneac damu nga kengec mi ambisia. (*Yesaia 8:12*)

<sup>15</sup> Kebu Kristo ye kpetiac, ngeni negen negeng imoc ubaherenginau mekecbisia. Amma gombungangina ngade haude, imocac hania goriangoc kpesingemmegec turunga merenggecdeac nasosoc efaima kecbisia. <sup>16</sup> Ngeni ine kpesi kpesiac turunga herebuya kpac, yumea nga eweheiheigoc amma here negen negeng kpataningau merembisia. Ngeni ifi anggecdeu, angammemengina gombunga Kristoac amma angkecdae, imocac ngic dedenggbaring angkecdae, yeni gameyunuude.

<sup>17</sup> Ngic mong ye angammemea gombungaac amma Anutungo negemmiu kpendzeng kpeude, imocngo ngereeude. Nga mong ye fakaya manganaac amma kpendzeng kpeude, ye mi dengerebesonga.

<sup>18</sup> Kristongo Anutuac hoannu fainunuudeac atac mocgu donina mema kpendzengtoa kpeec. Ngic dindingacngo yoackpekpe areng nenanggac amma ifi anec. Ye sebiugeng kpegec homeec nga ongaasuugeng bic megboriu kefec. <sup>19</sup> Kecma asu goa witicamau kecgec, yenearu kemma yoc edekpou ayemmeec. <sup>20</sup> Noa ye wagea memanu Anutungo modzotitia kpac tomaingina kecbibie-manu yeneng yoara kpegec.

Nga Noango wagea medzickeu naso imohai Anutungo dokungo ngicngac efeanec, 8sac ebic-

funac mesiyunuec. <sup>21</sup> Dokunadzicngo onga imoc mema ebicfunac mesingunuude. Dokunadzicngo sebiac wonong mong mi dzuarude, kpac. Imoc yofi, Yesu Kristongo homecfunac yarecac amma herenegen negengngina kpetiac anude, imocngo Anutuac kicfu deficgeude. <sup>22</sup> Yesungo bic kuru-mennu enec. Amma ye Anutuac foiau tacde. Nga angero nga wiac kpac kuneng memea amma kuc yemmeyemlea, yeac bageu bic faiyunuyunuya kecdae.

## 4

<sup>1</sup> Kristongo sebigoc kpendzeng kpeec. Nga ngeni yeng kpendzeng kpeec, ifi isoc naric kpegecde, negen negeng imocngo marikungina ambeso. Ngic mong ye sebigoc kecma kpendzeng kpeec, yeng kopocsicac sing bic waec. <sup>2</sup> Nga yofinenggac nangennide, ye ngicngac yeneac negensongo hania hania monggoc mi modacma Anutuac negen negeng nga songo modarude. <sup>3</sup> Bangec monnunac ngicngac Anutu mi negemmidae, yeneac kekecac negensongoac faka yofi fede, imoc kaiserofaka nga kickerec angkecdae amma doku seria tosofocnginagoc nema ubangina sufuande nga sing sege segea modacma imocac siricfu nemu hania hania afehegecde. Ngeni warac faka ifia angkecgec imoc monggoc mi ambisia. <sup>4</sup> Ngeni bangec monnunac ngicngac sicsauc fakangina hania hania anggec ngeni yenigoc monggoc mi torokpema kecdaeac amma yeni imoc hemma negenggec siriha mong anu desusuic amma demanganengunugecde. <sup>5</sup> Anu Anutungo ngic gbori nga homemea

angammemengina desiudeac efaima kecede, yearu haniangina debisia. <sup>6</sup> Ngicngac homemema yeni siduc gombang edekpou ayemmegec negenggec, yeni warac sebiugeng kecec kecec, imocac sirihau turunga megedce. Ifi mema asuu Anutu kecede isoc kecedce.

<sup>7</sup> Wiac sasawa imoc kpac anudeac naso wegenede. Imocac ngeni garengemema negengisinggoc kecma nunumu ua mebisia.

<sup>8</sup> Heresongogoc kecec imocngo kopocsic hania hania homac kperaheude, ngeni imocac amma songo fora heregoc negengemema hoangemebisia, imocngo faka engena ande.

<sup>9</sup> Ngeni ubangeregoc modzotiti nga ngadeyoara kpac kecma ama heiemema garengemebisia.

<sup>10</sup> Anutungo wosoefahaac amma Tiri Asuac kuc hania hania ngemmeec, imocac ngeni Anutuac kingang kpekpe gombunga kecma tembuc tembuc meficemema kecbisia. <sup>11</sup> Ngic mong

ye miti hania ngicngac dekperagiyemmeude, ye Anutuac yoac modacma dekperagibeso.

Amma mong ye memeficac arennu kingang kpeyemmekecede, ye Anutungo kuc miande,

imocac sirihau kingang kpekpe ua mebeso. Ifi anggec ngicngac yeneng faka sasawa

imoc hemma Yesu Kristoac negemma Anutu dengeregedce. Ye kibikperagi nga kuc mingina

nasoya wisic wisickea kpac fekengkecbesande, imoc fora.

<sup>12</sup> Songo tosofocna, faitobang kpendzengagoc fingecongemmeude, imocac mi kpidohobisia. Nga imoc fingecongemmeude, imocngo faka furia mi

ande. <sup>13</sup> Nga ifi fingecongemmeu imohai ngeni

Kristogoc torokpema kpendzeng kpema imocac sirihau sogabisia. Ifi anggec yeng kecma kuc kibikperagiagoc fingectegerude, imohai ngeneac sogac sogaitoa fingerude. <sup>14</sup> Nga ngicngac yeneng Yesuac kpacac amma demanganengunuma defagoc angemmegecdeu ngeni kenecnginagoc, nocac yeni ifi angemmegec Anutuac Asu kuc nga kibikperagiagoc, yeng ngeneac witiu tarude. <sup>15-16</sup> Nga ngic mongngo kpara, “Kristoac ngic,” ifi dekecdaeac kpendzeng kpedeu ye imocac ine game mi kpebeso, ye kpac imocac amma Anutu dengerebeso. Nga ngenearunac mongngo ngic kpekpe me wiac hamangec meec me yarengic ande me ngicngac ogofocngina goa yeneac wiac imocac hodzinggeude, ye fakaya ifiac amma kpendzeng kpeu gameagoc ambacac ngeni faka ifia mi angkecbisia, kpac.

<sup>17</sup> Imoc yofiac, Anutu ye yengena ama arengfora yenearu sing hanahema faka nga angammemengina isinggema desiudeac nasoya wegenede. Amma ye nenanggaru sing uaya imoc hanaheudeu areng goa yeni siduc gombunggac yoac kpeandae, yenearu uaya torokpema angammemenginaac turunga engenangoc yemmebesande. <sup>18</sup> Nga,

“Ngicngac faka dindingac modacandae, yeni faitobannu emma kekec uatoa mema firang amma komoc kpegecde. Faka ifia fingecngemmeudeu, kopocsicmeme nga Anutu ngadeheandae, yenearu ebictoa fingerude.” (*Yoac negen negengagoc 11:13*)

<sup>19</sup> Ngicngac Anutungo negengyemmeu kpendzeng kpeandae, yeni angammeme

gombunga angkecma ubaongangina hafaogoc Anutu bangec nga kurumeng meficgeec, yeac mariu faibisia, nocac ye dedzegeyoara mi waude, kpac.

## 5

<sup>1</sup> Kristongo kpendzeng kpeec imoc kicnango henai nga imocac hepuc kecduae. Amma kuc nga kibikperagia fingerude, imohai nenahafoc kecnide. Kpebunggac enara ni ngenigoc ifingoc ua imoc mema kecduaengo gorongina kpema yofi deduae, <sup>2</sup> Anutuac habungo ngeneac botucfu kecdae, ngeni yeni gombunga garengyunuma ubaebicfu ua mi mebisia, ngeni ubangerecgoc ua megec Anutungo negenu ngereeude. Amma ngeni hiedzonginagoc anggecdeac ua imoc mi mebisia. Ngeni uangina imoc mamangkima mekecbisia. <sup>3</sup> Anutungo kpebung ngemmeec, imoc yeneac engenangina isoc mi kecbisia. Ngeni faka gombunga kpebung edzacyunugec, yeni imoc hemma modacbisia. <sup>4</sup> Ifi kecmagec gareng yadango fingectegecma yeng irangina kuc kibikperagiagoc dzame dzamea kpac ngemmeude.

<sup>5</sup> Sebigbori ngeni ifingoc yadafocngina yeneac bageu memaemema kecbisia. Amma ngeni sawa fakangina yumeau angemema kecma imoc wamba isoc heigec kemebeso. Imoc yofiac, “Anutungo ngicngac sebiengeng kecdae, yeni wayunuma memayunuude nga memaemema kecdae, yeni danggunuha yemmeude.” (*Yovac negen negengagoc 3:34*)

<sup>6</sup> Imocac ngeni Anutuac mariseriaac bageu memaemema kecbisia. Ifi kecmagec Anutungo yengena nasou miacngunuude. <sup>7</sup> Ye yengenaoc ngenenggareng angkecdeac ngeni ubaebicngina sasawa yearu faidacbisia.

<sup>8</sup> Ngabangina mangana mingina, ye raiong isoc arohoma yerecgema ngicngac gbokoyunuudeac hofocyunuma uatoa mekecde. Imocac ngeni ubagbori kecma garengemema <sup>9</sup> gofochima serima namma negen negensingnginango mangana minginaac yoac hefahebisia. Hefahema yofi negembisia, negen negensinggoc tosofocngina bangeha bangeha kecdae, yeni ifingoc kpendzeng imocngoc kpekecdae.

<sup>10</sup> Anutu danggunuc mingina, yeac kuc kibikperagiango fefeseri fede nga yeng ngeni ihai Yesu Kristogoc kecgceac kpacngunuec. Nga ngeni kpendzenu nasu wegenanec kecekemmagec, yengenaoc mengerengunuma nonggo tacngemmeu seria nanggecde. <sup>11</sup> Ye kuc mingina amma kechereema kecbesande, imoc fora.

<sup>12</sup> Siriwano ye negen negensinggoc tosonina yeac yofi negemma deduae, ye uau serima namma meficnuu kibi wegena yomoc ohongemmeduae. Ni nanggengunuma Anutuac danggunuc fora imocac hepuc amma dekperagingemmeduae, ngeni imocac hoannu seria kecbisia. <sup>13</sup> Anu Anutungo Babirong taonnu kpebung kecdae, yeni nga ngeni ngenahafoc meisingngunuec, yeni nga medacna Mareko, yeneng ubangerecyoac ngenearu faigec hade. <sup>14</sup> Ngeni heresongogoc

hoangemema wenacngerec dema kpetiacfu  
titikokoc angemebisia. Ngicngac Kristogoc  
kpeketahema kecdae, yeaç ruaengo sasawa  
ngenearu febeso.



**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 3 Mar 2023 from source files dated 9 Oct 2020

19b7c48c-f4ce-5007-838d-58f01dc01ecc